

欽定全唐文

欽定全唐文卷六十八目錄

敬宗

授李程平章事制

授竇易直平章事制

授牛僧孺集賢殿大學士監修國史制

授牛僧孺武昌軍節度使制

處分賢良方正等科舉人制

封皇子普爲晉王制

授裴度司空平章事制

停郢州刺史馮定官制

流劉伉雷州制

賜將士錢絹詔

令京兆府平糶詔

疏決囚徒詔

令市耕牛詔

清理庶獄詔

試制舉人勅

優恤客戶勅

減奉先縣租役勅

賜義成軍節度使高承簡立德政碑勅

賜高承簡勅

罰李方現俸勅

光陵禮成優勞德音

御丹鳳樓大赦文

南郊赦文

受尊號赦文

欽定全唐文卷六十八

敬宗皇帝

帝諱湛穆宗長子元和四年生長慶元年三月封鄂王徙封景王二年十二月立爲皇太子四年正月即位寶歷元年四月上尊號曰文武大聖廣孝皇帝在位三年年十八謚曰睿武昭愍孝皇帝廟號敬宗

授李程平章事制

理多務者必資經遠之能總衆材者實在選舊而任疇咨輿議參詢廟廷果獲誠臣副予虛位正議大夫尚書吏部

侍郎上柱國渭源縣開國男食邑三百戶賜紫金魚袋李  
程文含鍾律器挺珪璋行已蹈常與物無吝早以詞翰密  
侍帷幄開宏顧問發揮訓謨周旋臺閣閱歷中外秀造稱  
其得俊衡鏡表於無私卑牧難踰深藏不耀朕荷負重構  
祗守大業自顧寡昧動遵先規委成台司不操匠斲自居  
無悔之地以馳至正之途而元輔披陳勇於進類常思任  
人與自任不若因賢以求賢命之僉求以名列上而程爲  
舉首是必至公爾宜謹繩墨以示諸侯平好惡以待多士  
秉彝倫以澄躁競覈名實以鎮浮虛協睦乃僚無替朕命

爰因銓品之鑒載佇烹飪之功可尚書吏部侍郎同中書  
門下平章事散官勲賜如故

授竇易直平章事制

昔周宣王漢宣帝思宏祖業克紹先構用申甫邴魏爲相  
然後周道重熙漢德累洽朕以沖眇託於億兆之上緬惟  
文祖元宗之理若涉大水浩無津涯詢於巖廊俾舉髦碩  
果得才傑副予虛求必惟其人乃命以位朝議郎守尚書  
戶部侍郎兼御史大夫判度支上柱國賜紫金魚袋竇易  
直端厚靜慤直方簡廉氣深而和識敏而達每去華而務

實不爲善以近名早以器能揚歷中外司憲著紀綱之績  
廉俗垂惻隱之仁輒於天官掌我邦計底慎財貨均節委  
輸賙給不窮贍濟皆足國有大柄屬於全才況朕親臨寶  
圖萬物資始審象而授其代予言爾尚弼予一人用底於  
道且漢以丞相調兵食周以冢宰質歲成我國家雜用古  
制以重其事也爾往欽哉無忝我成命可朝散大夫守尚  
書戶部侍郎同中書門下平章事判度支

授牛僧孺集賢殿大學士監修國史制

門下寅亮天工弼諧庶務宏我一德撫綏萬邦佐予沖人

以底於理將推恩於天下必首自於輔臣是用極其褒崇  
增其命數訓正圖書之府裁成義例之條銀青之階光於  
七命茲所以賞勞而馭貴也正議大夫守中書侍郎同中  
書門下平章事上柱國奇章縣開國子食邑三百戶賜紫  
金魚袋牛僧孺大玉不琢喬松挺姿文探典謨學貫流略  
自綸閣掌誥會府貳卿聲實彰華人德歸厚先朝嘉其器  
業爰命奮庸秉事君之小心蘊難奪之大節往以聖體違  
豫潛心保和乃能畫一持平守而不失朕自膺寶歷深仗  
股肱每申勇退之懷用廣進賢之路損而招益謙乃彌光

實簡朕心克諧僉論必能刊魚魯於往籍垂褒貶於國書

可門下平章事兼集賢殿大學士監修國史

授牛僧孺武昌軍節度使制

門下朕恭承大統屬當平寧方委心輔臣釐齊法度垂茂  
績於百代建休風於一時有深畏滿盈雅懷止足體陰陽  
迭敘之旨全進退居正之心抗詞不回秉志難奪得不處  
之安郡益以榮名是用建新軍以統武昌佩相印而兼齊  
斧文武二柄付於全才金紫光祿大夫中書舍人侍郎同  
中書門下平章事兼集賢殿大學士監修國史牛僧孺貞

方而和裕慎密而坦夷秀乎文華篤於行實以直策悟憲  
宗以忠啟奉先朝積有信誠擢於廊廟法無越制官無及  
私門無託賓道無偏倚逮茲旬歲亟聞昌言朕嘗惕然虛  
己以聽既終園寢之重克修郊廟之儀前志彌堅陳懇益  
固吾方涉學宏濟斯人未耜戈矛仁壽鄙天簡予懷者非  
爾而誰是用輶中樞圖史之間開夏口油幢之府典型八  
座廉問七州往惟休哉無替厥服可檢校禮部尚書同中  
書門下平章事郢州刺史武昌軍節度使

處分賢良方正等科舉人制

朕深居法宮高處寢極嘗慮天下多務壅於上聞朝廷大  
猷關於中典至於伏陛叩願造膝犯顏皆驟遷顯榮寵以  
優錫尤思物不得茂遂道有所鬱堙是用虛衷訪賢側席  
前殿緘密以獻閱自朕躬切弼予違無所回忌第於上下  
揚於正朝吾之不妄亦可謂信於海內矣賢良方正能直  
言極諫科舉人第三等唐伸韋端符舒元褒第四等蕭敞  
楊魯士楊儉來擇趙柷裴惲第四次等韋繇李昌實嚴荆  
田鬯崔璜第五上等李漣蕭夷中馮球元晦詳閑吏理達  
於教化科第五上等韋正貫軍謀宏遠材任邊將科第三

等裴傳第四次等侯雲章咸以讜言正詞兵符教本應問  
如響不窮如泉著之於篇爛然盡在宜膺中鵠之選用叶  
縻爵之經在第三等人委中書門下優與處分第四等第  
四次等第五上等中書門下即與處分

封皇子普爲晉王制

門下昔周室之興也藩戚並建式資於維城漢氏之制也  
皇子畢封用固於磐石斯所以載宏丕緒惟懷永圖且茂  
德於本支遂推恩於嗣息況祗荷眷祐屬當長賢宜承寵  
章允膺舊典長男普幼稟異質夙應嘉祥旣表岐嶷之資

日暮恭良之性朕以寡昧虔奉宗祧庶明父子之親以及  
君臣之義命以樂國錫其介珪用敷可久之基爰叶至公  
之道可封晉王宜令有司擇日備儀冊命主者施行

授裴度司空平章事制

朕周觀帝王之道春秋富則倚附舊老享厯久則簡擢俊  
髦故我元宗開元之始任宋璟姚元崇之輩以調陰陽東  
封之後乃用李元紘張九齡之儔以承法度洎予恭守大  
位於今二年巖廊藩封逮於左右前後皆皇祖聖父之人  
罔有易置況勲望冠代器業絕倫副予揣論贊此休運凡

百有位敬而聽之山南西道節度觀察處置等使光祿大夫守中書門下平章事兼興元尹上柱國晉國公裴度以忘家捍患協於憲宗以匪躬不撓佐於先帝十拜相詔四登帥壇接士猶布衣之心悲時急懸闕之思價重乎內外名殷乎華夷藉是風猷俾參大柄且滿吾志亦用僉聞於戲君臣合符不可多得千載一遇猶爲比肩爾宜援古以自強垂後以居重文終之畫一平陽之并容諸葛持衡之公相如引車之意率彼四子足爲成人服茲昌言往踐乃位可守司空同中書門下平章事仍令所司擇日備禮冊

命

停郢州刺史馮定官制

馮定經使臣推問無入己贓私所告罰錢又皆公用然長吏之體頗涉無儀刑賞或乖宴遊不節緣經恩赦難更科書猶持郡符公議不可宜停見任

流劉伉雷州制

劉伉所犯贓私其數至廣恣爲貪猾固抵刑章若據本條合當極法以其大父於國有勞特爲矜量俾從寬宥宜除

名流雷州

賜將士錢絹詔

朕以寡昧祗膺寶位載懷悼懼豈所克堪而羽衛爪牙禁營師旅晝巡夜警協力悉心自始銜哀至於踐祚忠勤匪懈誠節用彰將圖錫賚務欲豐厚屬頻年旱薄御府空虛如聞邊上將士至今未給衣賜永言軫慮深切寤懷霑卹之時所期均濟兩軍官健各宜賜絲十匹錢一千畿內諸鎮各賜絹十匹錢五千軍吏及城內諸軍賞物節級有等仍於內庫更出綾絹共二百萬匹度支充邊軍春衣并天下州府賦稅如要蠲放者并委所司約此數均勘取濟凡

百將士宜悉朕懷

令京兆府平糶詔

京城米穀翔貴百姓乏食者多夏麥未登須有救卹宜出太倉陳粟四十萬石委度支京兆府類會減時價於東西街置場出糶其價錢仍司府收貯至秋收糶

疏決囚徒詔

近者夏麥垂熟霖雨稍多雖不甚損傷亦是陰陽小沴必慮囚徒之中或有冤濫宜令御史中丞刑部侍郎大理卿同疏理決遣訖聞奏其在內諸軍使囚徒亦委本司疏決

聞奏

令市耕牛詔

農功所切實在耕牛疲敝乏此理須給賜宜委度支於東  
鎮武靈鹽夏州分市耕牛萬頭交付京兆尹均給畿內貧  
下百姓其價以戶部綾絹充

清理庶獄詔

近日京城雖已得雨畿甸之內霑灑未周災歉是虞黎元  
重困救旱之備深所注懷宜令京兆府各勒諸縣令長疏  
理見禁囚徒除首罪外餘支證並責保放出其有法不得

原情有可恕者府司一條舉當爲繩免御史臺大理寺亦委本司長官親自覆視準前處分炎熾方甚狴牢可矜京城及畿內諸獄亦宜並與除放冀得存活

試制舉人勅

朕聞心術順道天下可一言而興聰明壅途堂上有千里  
之遠故唐虞而降則考試觀俗漢魏之際則詔策求賢朕  
纘紹丕圖撫臨方夏實懼誠有所偏信鑒有所未周乃前  
歲詔六官九卿方岳尹正有位之士逮於庶僚高懸四科  
博薦羣彥將訪衆政之闕酌至論之中子大夫庭列儼然

各應其品是用宵興前殿永日渴求條列坦明咸本經史  
固子大夫之所講磨矣當竭誠慮無有蘊藏宜坐食訖就  
試

優恤客戶勅

黔首如有願於所在編附籍帳者宜令州縣優恤給與閑  
地二周年不得差遣

減奉先縣租役勅

奉先一縣獨奉八陵供辦支持實爲繁併眷言物力須議  
優矜宜委京兆府減一半租并雜色役等令諸縣均出

賜義成軍節度使高承簡立德政碑勅

得守義奏當道將吏等請爲卿立德政碑卿位崇庶僚寄  
殷東夏扼洪河之險東當白馬之要津制機於事先銷萌  
於慮表而能文武參用農戰兼修人俗載安軍政斯理繙  
黃遂性耆耆樂生懸懇陳誠飛章上請延覽休績欣然注  
心今令翰林侍講學士崔郾與卿撰碑文庶使龔黃之美  
無愧於前修羊杜之風豈慚於後代卿有緝綏之美朕成  
委寄之功不朽之名上下同有眷言嘉歎無以過茲想宜  
知悉春寒卿比平安好遣書指不多及

賜高承簡勅

勅承簡卿家傳韜略門襲麾幢累受藩邦皆著勞績黎元安集師旅和寧忠効章明聲猷暢洽頃得守義奏云官吏將校耆老縉黃同請立碑紀卿德政非公方達於事任惠化感於人心豈能致其懇誠固求篆刻眷言嘉歎寤寐在懷昨遣翰林侍講學士崔郾撰述翰林待詔徐幼文書德以庇人政能利物觀其辭理亦頗周詳將垂不朽之名用播一時之美無慚峴首何愧色絲其碑本故今賜往想宜知悉春暄卿比平安好遣書指不多及

罰李方現俸勅

李方現不自謹身有此喧競假如品官凌忽只合具實奏聞輒肆狂疏恣行毆擊傷人見血理在難容但以父有勤勞身叨宗屬特從輕典粗以繩違宜量罰兩月俸

光陵禮成優勞德音

朕孤藐罹疾慈嚴早違靡日不懷終天無逮將欲躬護園寢哀達神明而公卿庶寮懼伏奏迫以重義奪予至情是賴一二鼎臣凡百執事咸懷嚴奉各表哀敬百靈拱衛六合會同終始四時無爽違之憾往復千里免塗潦之虞

感歎盈懷是申勞典旣加恩以頒錫遂流澤以蠲租山陵  
使禮儀使兼陵所攝太尉行事官各與一子七品正員官  
仍特加一階山陵副使按行使並賜爵一級各與一子出  
身橋道置頓使賜爵一級與一子官出身內山陵使兼修  
橋道使賜絹一百五十匹銀器二事特加一階修築使賜  
絹七十匹特加一階按行使賜絹五十匹特加一階修築  
副使賜絹三十匹加一階鹵簿使儀仗使並賜爵一級各  
與一子出身橋道置頓副使各加兩階昇梓宮官三品五  
品賜爵一級六品以下各加一階神策六軍修築官健及

檢校軍使陵所造作押當官吏及中使等并諸司諸使應  
緣山陵修道造作及專知執當工匠等賜物加階爵減選  
有差吉凶儀使諸色行從官等五品以上各加一階如已  
至三品五品未合敘者賜爵一級六品以下各加一階撰  
哀冊書寶讀冊官等五品以上賜爵一級六品以下各加  
一階昇寶冊官及橋道置頓官儀仗鹵簿使判官等各賜  
階級勲改選減有差其挽郎放出身後七選許集南郊及  
太尉侍中告諭冊謚寶靈座前進謚寶奏外辨奠玉幣酌  
獻等各賜爵兩級餘減勞考有差其數處職掌任所便從

一司處分奉先縣營奉力役勞敝極深來年夏青苗錢宜  
令放免櫟陽美原高陵富平來年夏青苗錢每貫放二百  
文不滿貫者每百放二十文仍委逢吉與府司計科便以  
山陵用不盡錢與填所放錢數其近道鄉村坊市屋宇什  
物田苗等有被毀損并近陵百姓偏有役使理宜節級優  
賞並委京兆府審勘聞奏

御丹鳳樓大赦文

自長慶四年三月二日昧爽以前大辟罪已下罪無輕重  
常赦所不原者咸赦除之左降官縱元勅云終身不齒者

亦與收錄諸色得罪人先有勅云縱逢恩赦不在免限並別勅安置者亦放還京畿諸縣應今年夏青苗錢並宜放免秋青苗錢并河南府夏苗錢每貫放二百文其京兆府路所放青苗錢外更放錢五萬貫斛斗五萬石河南府除所放青苗錢外亦更量放錢三萬貫斛斗三萬石其天下常貢之外更不得別有進獻縱節度觀察使入朝亦不得進奉諸道監軍自今後在本道并入奏並不得進天下所貢奇綾異錦雕文刻鏤一事已上有涉踰制者悉斷至於喪葬嫁娶車馬衣服事關制度不合踰越委中書門下明

立科條頒示天下有不守者御史臺及出使郎官御史嚴  
加訪察節級科處其六宅十宅諸王女宜令每年於選人  
中擇端良者降嫁老宮人及殘病不堪使役並有父母羸  
老疾病者並委所司選擇放出鷹犬之類本備蒐狩委所  
司量留多少其餘并解放仍勒州府更不得進來宮禁經  
費及乘輿服膳委所司起今年三分其本色物價及水陸  
腳價一半委度支收管一半便任本州收充助貧下戶闢  
額稅錢其元和已來兩河節度使全家歸闢者如張茂昭  
王承元程權劉總田宏正等五家在本道日所有債務并

有異於法制之事被人言訴者一切不得爲理仍各與一子正員官天下州府財物有餘羨者委觀察使及所管州郡約舊事費用者條件縣中書門下便差官類例詳定可留可去者聞奏務從寬濟勿使難守其餘羨錢非兩稅外徵率並不用勘問自今已後州府所申戶帳及墾田頃畝宜據見徵稅案爲定後與戶部類會具單數聞奏仍勒五年一定稅如有逃亡死損州縣須隨事均補亦仰年終申戶部如有隱漏委御史臺及所巡院察訪聞奏天下兩稅及諸色榷糧稅等錢幣重輕須有損益亦委中書門下條

疏聞奏諸道除正勅率稅外不得擅有諸色榷稅涉擾人  
並宜禁斷其軍屯營種有侵占丁田課役稅戶者宜委御  
史臺切加訪察仍限勅到一月內每道各具所還州縣頃  
畝分析聞奏其諸軍先擒獲吐蕃生口配在諸處者宜委  
本道資給放還本國天下諸州府縣官吏應行鞭捶本罪  
不致死者假以責情致令殞斃每念於此良增惻然宜委  
御史臺及出使郎官御史等切加察訪仍具事由聞奏天  
下諸色人中有賢良方正能直言極諫經術優深可爲人  
師詳閑吏理達於教化軍謀宏遠堪任邊將者委常參官

並諸道節度觀察使諸州刺史各舉所知限來年正月到上都其所在淫祠不合禮經者並委長吏禁斷

南郊赦文

門下朕以眇薄纂承洪構祗見九廟肇祀二儀外飾備物中惟盡敬昆蟲草木之實致豐於蠲潔哀樂和愉之感庶交乎神明四海駿奔衆祇受職冀下觀而化皆內誠乎心百王之禮樂在陳列聖之聲詩合奏敬極嚴配道備饗親虔奉成式惕然惴懼而今而後不敢滿假庶無大悔以貽祖考之羞因體元以統歷遂頒恩而大宥可大赦天下改

長慶五年爲寶歷元年自寶歷元年正月七日昧爽已前  
大辟罪已下罪無輕重已發覺未發覺已結正未結正繫  
囚見徒常赦所不原者咸赦除之其官典犯贓不在免限  
左降官自長慶四年三月三日制後未經量移者與量移  
近處已經量移者更與量移如復資者即任依常調選丁  
憂去任服闋日亦與量移如有親故在上都任於所司陳  
狀便與處分不必更待本州府申請別勅因責授降資正  
員官未經改轉者亦與進改亡官失爵放歸不齒者量加  
收敘縱元勅云終身不齒者亦量與收敘流人未到所在

及已到者量移近處如已收斂者量才敍用并僧尼道士  
移隸者亦與量移近處得罪人已亡歿家口未許歸家者  
一切放歸如自情願住者亦任諸色得罪人中如先有勅  
云縱逢恩赦不在免限者并別勅安置者亦并宜委中書  
門下量事狀輕重節級處分左降官及流人先有官者如  
已亡歿各還本官流貶人所在身亡任其親故收以歸葬  
仍仰州縣量給棺櫬優當發遣諸色人中有痕累禁錮及  
反逆緣坐等一切並與洗滌常參官及諸州刺史有先因  
停替及因病假解官並終制未授官者委中書門下量才

進錄勿令稽滯致仕官未經改轉者量改官依前致仕諸軍先擒獲吐蕃生口配在諸處者宜委本道資給放還本國母許因循所在停住國家與吐蕃舅甥之好彼此無虞自今已後邊上不得受納投降人並擒獲生口等天下諸州府縣官應行鞭捶本罪不至死者假以責情致令殞斃每念於此良增惻然宜委御史臺及出使郎官御史等切加覺察仍具事由聞奏澄清教化莫尚乎太學惣治心術必本乎六經天下諸色人中有能精通一經堪爲師法者委國子祭酒選擇具以名奏天下州縣各委刺史縣令招

延儒學明加訓誘名登科第即免征徭刑罰不清不足以  
言理職官不重不足以棲賢開出入之文束上下之手必  
資慎選庶叶詳平大理寺官屬比來吏部所授多非其才  
宜令精選有志行文學兼詳明法律者注擬其有課績特  
殊堪在朝獎者臺省有關宜先選擢一夫不獲時子之辜  
苟有向隅之悲遂軫納溝之慮如聞去冬吏部三銓選人  
駁放者衆或文狀稟錯或書判差池主司守文不得不爾  
既施惠澤亦在霑恩其長名及雜駁放選人如有未離京  
城者委吏部今月內檢勘畢除涉踰濫者餘并却收以地

遠殘闕量才注擬如不情願受地遠官亦不可強之仍速處分不得出選限內比者法令懸科彰示大信法既無守人何適從赦令不行因循成俗誕告四方爲虛設開施庶政爲虛文豈吾德之未明爲有司之見負永言歎息中夜疚懷朕即位之初已有赦令至如捐徹服御止絕地獻限喪葬以息淫費禁奇靡以專女工隱實版圖謹守儲備及從他徭擅賦閑糴禁錢吏行姦欺人冒依庇僧道踰濫流貶重輕錢幣利害軍屯侵占車馬衣服之制度公私入己之贓悉令條疏貴欲該備頒宣未幾廢格已多或職司

墮慢而不能將明或誥命纔行而下已不守以此求理不亦難乎其元和已來詔書並長慶四年三月三日赦令委廢不行事在朕躬者諫官極言得失無有所隱其系臺閣者左右丞據詔條司額重加分配勿容推倚若因循寢廢無所申明及雖曾宣下不能提舉者具事由聞奏量加沙汰其在有司州郡者委御史臺及分察使出使郎官御史度支鹽鐵巡院準前後詔勅切加訪察各具犯狀移勘奏聞其本判官及刺史已下必加貶責用懲不恪如舉察之司循默自守事狀泄露者亦據容庇量加殿黜仍並委中

書門下重有舉明去年三月三日赦令及今年赦文一事  
已上切加懲督責據時限量官吏勤惰具科殿輕重聞奏  
京西京北邊上諸軍州鎮自今年已後如有中使及郎官  
御史奉使到所管並不得與人事物應天下典人莊園店  
地便合祇承戶稅本主贖日不得更引令式云依私契徵  
理組織貧人虞氏建官必明黜陟漢朝置吏皆長子孫政  
成簡用咸登右職近代遷除過速資給轉繁扇爲時風莫  
有固志親人之職爲弊尤深毗俗土宜未及周悉迎新送  
故已聞代換更易雖遽資望如初善否不分升降莫驗徒

爲煩擾無益公私自今已後刺史縣令若無所犯非滿三  
周年不得除替如理行尤異但議就加其有才宜他職灼  
然要籍者中書門下先具事由及授上年月奏聽進止滿  
歲遷代無闕敗者即與進改磐石維城義深麟趾穠華下  
嫁禮次椒塗縉紳文武之良才執事恪居之奉職克參裸  
獻載叶肅雍亞獻嘉王運終獻循王遹等各賜物一百匹  
夾侍正衣進珪捧珪各賜五十匹亞獻終獻正衣各賜物  
四十匹大長公主嗣王郡主縣主各有賜物内外文武見  
任及致仕官三品已上賜爵一級四品已下加一階合入

三品五品欠考未合敘者待考足日聽敘斯文未墜降聖  
克昌道逾三代之英化立百王之範象賢崇德垂裔作賓  
教儀斯崇憲章無改文宣王二王三恪各與一子官其祠  
廟委所司量加修飾堯稱敦敘周述本枝收族是先睦親  
斯在皇五等已上親三品已上賜爵一級五品已上加一  
階六品已上及前資常選散官簡選日優與處分未有出  
身陪位者每家放一人出身應陪位者皇儲五等已上親  
及太皇太后皇太后三等已上親三品已上賜爵一級四  
品已下加一階諸親四等及諸州賀正官並諸色陪位官

等五品已上加一階六品已下及白身人並賜勲兩轉其  
前資及有出身者各減一選繙構興王弼成昌運勲藏冊  
府烈冠史編九原推可作之風百代凜如生之氣載懷不  
績何日敢忘武德以來配饗功臣及將相名節尤著長慶  
四年三月三日制未霑甄敘者委中書門下條疏聞奏量  
加優獎故尚父汾陽王贈太師晟贈太尉秀實子孫中未  
曾經甄獎者每家與一人正員官元和已來有因戰伐死  
於王事其名節顯著未有優贈者各委本道節度使條錄  
聞奏如勘覆詣實當有處分其有骸骨暴露者宜令所在

埋瘞宏教愛之典爰命推恩念追遠之懷用頒徽贈常參  
官及諸州府長官父母見存未有官封者並量與五品致  
仕官及階并邑號父母亡歿未經追贈者量與贈官及邑  
號已經追贈者更與改贈如贈官已至一品邑號已至國  
夫人者不在此限中書門下及節度使帶平章事者宜與  
一子正員七品官祖父母父母先亡歿各與追贈經追贈  
者更與改贈官已至一品邑號已至國夫人者不在此限  
節度使與一子正員八品官東都留守度支鹽鐵使觀察  
處置都團練都防禦經略招討等使及神策金吾六軍將

軍大將軍上將軍統軍威遠鎮國軍等使皇城留守各與一子正員九品官京兆尹特加一階父母先亡歿未經追贈者各與追贈職修祀事禮奉嚴禋既洽殊恩宜加異等應郊廟升壇升殿行事官普恩之外宜更加一級如合入三品五品者任待考足日聽敘尚書省三品四品已上中書門下五品已上特加一階便蕃殿省給事郊丘顧以忠勤是宜甄獎內行事官三品已上更賜爵一級四品已下更加一階內侍省及內侍省內坊官四品已上各賜勲五轉五品已下各賜勲三轉應從駕至郊廟者普恩之外三

品已上賜爵一級四品已下各加一階品官白身賜勲兩轉環列師營服勞扞衛申威攸屬敷惠是膺神策六軍金吾威遠皇城及諸道將士等三品已上賜爵一級四品已下加一階無官者賜勲三轉在城神策六軍威遠營左右金吾及皇城將士應大禮移仗宿衛御樓立仗等普恩之外三品已上賜爵一級四品已下加一階仍準舊制賜物有差其神衛將士賜加一階仍準舊例賜物有差神策將士應在京畿諸縣者亦各有賜物應緣大禮職掌行事官并修撰儀注及留守副留守倉庫卿等普恩之外三品已

上賜爵一級四品已下各加一階虔奉職貢載觀致仕官及郊禋俾覃錫賚之恩用廣懷來之義鴻臚禮賓院應在城內蕃客等各有賜物翰林待詔供奉及諸色直見任及前資并員外試官三品已上賜爵一級四品已下各加一階無官者賜勲兩轉導藩服之誠承帝庭之命忠勤既著勲賞宜周諸道知上都進奏院官在城者各賜勲兩轉應緣大禮四方進表疏及賀正官各賜勲三轉敬承禋祀贊執豆籩列庶位以觀光酌多儀而中矩誠在儼肅理叶褒升郊廟行事齋郎減二年勞室長掌座禮生贊者減一年

勞無勞可減者便放出身崇元館行事學生及齋郎禮生  
番考已滿所司緣大禮却追入行事各減一選國子監學  
生陪位者賜勲一轉中書門下儀制官各特賜一階應緣  
祇供作官直司長上諸州行綱考典兩縣耆壽諸色番役  
當上在城并量留十二月番者各賜勲兩轉飛龍閑廄宮  
苑典引掌扇內園總監裁接少府將作內中尚武德軍器  
內外弓箭庫等諸司諸使下白身人及無品直司定額長  
上雜匠巧兒黃衣長上監門直長雜使三衛七色引駕細  
引執扇角手弩手曠騎武士天文觀生歷生漏生典鼓典

鐘工人樂人主衣主膳主酪典食胡食手宰手掌閑幕士  
御士醫士獸醫門僕藥僮御書手楷書手典書流外行署  
等各賜勲兩轉尚年貴老所以教孝也聳義嘉節所以貞  
俗也天下百姓高年者上縣以上每縣十人中縣五人下  
縣三人並以縣界年最高者充數并孝子順孫義夫節婦  
先經旌表行義不虧者人各賜米三石絹兩匹仍版授上  
佐縣君並委令長賚粟帛就家宣賜訖具名本道一時聞  
奏其米及絹仍令上供數內申報神配峻極德稱靈長秩  
既升於王公禮合加於牲幣五嶽四瀆宜委本州府長吏

備禮致祭當極豐潔以副如在之誠書稱望秩禮著不封  
仰堯舜之聰明慕文武於方冊遐想忠貞之跡緬懷義烈  
之風能禦大災咸申祀典名山大川及自古聖帝明王忠  
臣烈士各令所在以禮致祭亡命山澤挾藏軍器百日不  
首復罪如初赦書有所不該者所司具作條例聞奏敢以  
赦前事相告言者以其罪罪之赦書日行五百里布告天  
下咸使聞知主者施行

受尊號赦文

門下朕聞奉天地之大統必酌於人心荷宗祖之成訓必

參於國典顧惟眇身守任重器道未能被物德不足蓄身  
賴於宗工碩老輔導丞弼享祧主鬯熏燎告元履歷正元  
敷施大號庶方咸若四表穆然皇祖披攘之基列聖焦勞  
之業恬焉而有泰焉而居晝以度心夜以省己其何德以  
堪之方將法乾以行健體咸而致和執沖以固高守約以  
持滿而文武百辟章奏四上以爲人心不可以曲讓國典  
不可以矯違亦用慰於太皇太后皇太后之意屈而後俞  
諒非獲已豈不以予非生知欲以徽稱懿號誘掖勸慕之  
乎將使循名而勉其實力實而應其名乎然則予方且以

爲韋弦方且以爲箴誥楙於皇極庶無尤違是宜與物同  
利惟新大澤可大赦天下自寶曆元年四月二十二日昧  
爽已前大辟罪已下已發覺未發覺已結正未結正繫囚  
見徒罪無輕重咸赦除之惟故殺人及官典犯贓不在此  
限應左降官未經量移者宜與量移近處丁憂去任服闋  
日亦與量移如準前制已合量移有司未注擬者並任累  
敘流人未到所在及已到未經量移者並與量移近處僧  
尼道士移隸未經量移者亦與量移近處中外前資見任  
官頃因延累未及用才并左降官中有事情可恕名跡素

聞者宜委中書門下量加獎用勿使屈滯授田制祿歲久而弊深留獄要囚期舒而濫廣隱冒啟逃姦之漸倍稱成豪奪之源亟舉舊章猶循宿蠹永言謀始必俟申明在京百司職田散在畿內諸縣舊制配地出子遂畝平攤比量舊制孰爲久便宜委京兆府與屯田審計會條疏奏聞如聞京城諸司捕繫推鞠動經旬時每季御史巡囚罕能察訪舉劾積成冤滯爲弊頗深宜委御史臺重舉用長慶元年七月十八日赦文條件聞奏京畿百姓多屬諸軍諸使或戶內一人在軍其父兄弟不受府縣差役頃者頗有

制勅處分如聞尚未遵行宜委京兆府重舉用長慶元年  
七月十八日赦文條疏聞奏應京城內有私債經十年已  
上曾出利過本兩倍本主及原保人死亡並無家產者宜  
令臺府勿爲徵理應天下典貼得人莊田園店等便合祇  
承戶稅本主收贖之日不得引令式及言私契組織貧人  
令煩而政撓積習而弊生欲其適宜須有釐革使人不倦  
必在變通今年正月七日制勅處分條目中有未經施行  
者委御史臺令提舉仍條錄聞奏宜委百司官長各具條  
疏當司利病奏聞擇其善者當議改更宏文崇文館生及

齊郎三衛所用資蔭踰濫頗多澄源清流切在釐革宜委  
禮部兵部侍郎條疏以久遠可行用者兼每蔭別限年限  
朔作條例聞奏懋官述職禦侮宣威暨於庶僚咸竭乃力  
峻其爵秩以極封崇内外文武見任及致仕官三品已上  
賜爵一級四品已下加一階仍賜勲兩轉神策六軍金吾  
威遠皇城將士普恩之外各賜勲兩轉列虞賓之位崇襄  
聖之允所以闡德教而昭前烈也二王三恪及文宣公各  
賜物三十匹朕上奉兩宮下臨九有庶幾廣愛之道以行  
教化之風太皇太后皇太后二等已上親委中書門下約

舊例量加優賞二廣分營六師環衛梯航貢奉玉帛會同  
既勤勞而可嘉亦懷來之所尚神策及六軍金吾威遠皇  
城等諸軍將軍統軍以下各有賜給其將士等長行立仗  
者并守本軍本營者各賜物有差鴻臚禮賓院應在城內  
蕃客等並節級有賜物宣贊盛禮潤色鴻徽爰錫寵於崇  
階亦推恩於任子攝侍中讀寶官門下侍郎平章事竇易  
直攝中書令讀冊官中書侍郎平章事李程各賜一子出  
身撰冊文官左僕射平章事李逢吉宜依舊例賜一子出  
身正員官奉冊奉寶綬官書玉冊官書寶官各加兩階進

寶綬進冊中嚴外辦理儀贊導押冊押寶綬舉畀寶冊官各加一階合入三品者待考足日聽敘合選人減一選其餘應職掌行事官及寫制書官太常修撰儀注禮官并官內行事官三品已上賜爵一級四品已下加一階仍并賜勲一轉造玉冊并填金字造寶裝官各賜五十匹前王之令政未有遺年先哲之格言實先顧行義存忠厚教裕家邦天下百姓九十已上委所在長吏量加存問孝子順孫義夫節婦旌表門閭終身勿事先已旌表者亦量加優卹生甫炳靈出圖表異故能發洩雲雨蓄涵風雷望秩之儀

必資蠲潔五嶽四瀆宜委本州府長吏備禮致祭名山大川及自古聖帝明王忠臣烈士令所在以禮致祭亡命山澤挾藏軍器百日不首復罪如初赦書有所不該者所司具作條例聞奏敢以赦前事相告言者以其罪罪之赦書日行五百里布告天下咸使聞知

欽定全唐文卷六十九目錄

文宗一

誅劉克明等教

授韋處厚中書侍郎同平章事制

加王播尚書左僕射制

授崔宏禮天平軍節度使制

授路隨中書侍郎同平章事制

授李宗閔同平章事制

封皇子永爲魯王制

授牛僧孺兵部尚書平章事制

贈李絳司徒制

授宋申錫行尚書右丞平章事制

降漳王湊爲巢縣公制

貶宋申錫太子右庶子制

貶宋申錫開州司馬制

授李德裕平章事制

授王涯同平章事制

答請慶成節表制

封諸王男爲郡王制

授李宗閔中書侍郎平章事制

恤刑制

授賈鯀中書侍郎平章事制

貶李德裕袁州長史制

授李固言門下侍郎同平章事制

授舒元輿李訓守尚書同平章事制

授王涯開府儀同三司充諸道榷茶使制

欽定全唐文卷六十九

文宗皇帝

帝諱昂穆宗第二子元和四年生長慶元年封江王名涵  
寶歷二年十二月即位改今名在位十四年年三十三謚  
曰元聖昭獻孝皇帝廟號文宗

誅劉克明等教

大行皇帝聰斷英明臨下以法方將致理以一區夏而妖  
兇構禍矯宣遺言不詢羣臣專斷神器恃近而迫衆倚兵  
而取威謂天地可欺神明可罔既而奸謀發洩兇黨彰聞

寡人義重君臣毒甚手足拊膺號惋誓清兇徒果有義烈  
副此誠志遂以宰相定議乃親率左右神策護軍中尉心  
腹近臣及諸職事官并左右神策六軍使兼諸軍使及飛  
龍將士等搜摘伏匿大擒諸妖或血刃當辜或赴井自斃  
其劉克明田務澄蘇佐明王嘉憲石定寬等二十八人並  
正刑書罔有漏逸歡呼震地抃快聞天此皆宗社威靈文  
武協力翦盜兇寇克有成算豈伊菲薄敢貪天功想於羣  
公多士中外藩獄皆累朝勲績先聖寵任致茲刷憤哀慶  
當同大行皇帝正柩於太極殿前率依光陵故事有司條

上務盡誠信其冢宰司空平章事裴度當攝立功將士節  
級各有優賞布告遐邇咸使聞知

授韋處厚中書侍郎同平章事制

構大厦者實先梁棟之材濟巨川者必資舟楫之用朕越  
自藩邸膺期大統夙夜震兢若蹈泉谷況齊咷思又艱步  
甫寧上奉山陵七月之期內佞性謹庶政之始匡我眇末  
置之極樞將恢興運之功俾協具瞻之望博閱名實獲茲  
忠賢實帝賚予其誰與讓正議大夫行尚書兵部侍郎知  
制誥充翰林學士上柱國賜紫金魚袋韋處厚體道爲徒

見義能勇居易以行古至和而不流冰霜挺松柏之姿貞  
白秉珪璋之德文揮風雅學該儒元器洽而保之以謙識  
明而用之以晦選自經藝侍於穆宗擢司密命實贊先帝  
壹彼直操彰其遠猷臨危勵難奪之誠推忠備宏益之道  
屬者變生宮掖謀俟經綸首參底定之功載竭忠貞之效  
雪憤橫涕披肝貢詞約我以禹湯罪己之勤博我以古今  
致理之要聽必感動悉其條陳洪纖靡差夢卜斯協必能  
式是中外啟茲雍熙俾予沖人克遂垂拱是用擢升鼎鉉  
式亮帝圖庶無愧於知人且用光於斯道於戲前哲有言

良臣惟聖處殷憂舉衆之任荷濟理沃心之期注四方傾聽之勤在百度維新之際無怠於誨無廢於身無曠於登庸無忽於詢事慎爾初守固其持平協廟廷卿士之和衷復貞觀開元之令政用乂乃辟罔非在中崇易簡久大之規茂庶富阜康之績勿替明戒時惟永圖汝往欽哉無忝我命可中書侍郎同中書門下平章事散官勲賜如故

加王播尚書左僕射制

宰相之任所以撫鎮國家出納王命弼亮刑政變理陰陽爲一人之股肱注四方之耳目僕射之職在於參贊萬務

統率六官師長百寮總臨臺寺冠中朝之碩望爲多士之  
具瞻其有久司利權累分閫寄位重邦教任隆臺階爰因  
入覲之榮再賜登庸之命俾升鼎鉉用輶旌旄淮南節度  
副大使知節度事管內營田觀察處置臨海監牧等使兼  
諸道鹽鐵轉運等使銀青光祿大夫檢校司徒同中書門  
下平章事揚州大都督府長史上柱國太原縣開國男食  
邑七百戶王播知識精深機神敏達長才適於通變雅量  
得於寬明亟登將壇仍佩相印休聲早振於全蜀成績近  
著於維揚山澤之貨無遺輸轉之資相繼用佐經費克彰

忠勞朕獲守宗祧君臨億兆尚賴匡救底於輯寧於戲爾  
有嘉謨我求懿德將期納誨以及交修冀霖雨之濡能普  
施於四海舟楫之利無專美於一方寵以端揆之榮仍茲  
榷筦之重往踐乃位汝其欽哉可尚書左僕射同中書門  
下平章事依前充諸道鹽鐵轉運等使散官勲封如故

授崔宏禮天平軍節度使制

門下節制師戎考察風俗誠藩方之倚任實朝廷之注意  
至於簡拔常所重難況齊魯分疆河朔接境遏寇虞而固  
封守宣德教而按州部付之專柄思得全才是用輟近輔

之循良撫東平之凋瘵式孚成命所爲至公正議大夫崔  
宏禮文學發身擴之以襟度忠信爲主輔之以誠明累分  
郡符亦揔戎鎮理行第一奏課連最來必畏晚去常見思  
挹長者之聲光得大臣之體要屬樂陵朱靖戎事方殷上  
宰憂勞舊恙纏迫念茲易置期在惠安當使恩威並行剛  
柔適用率之以義則無不化齊之以禮則罔不服恢武略  
以經務清吏職而約法必有餘地以康吾人大將鼓旗諸  
侯弓矢文昌顯秩憲府雄班參以命之寵茲俞往承我休  
德勿替前修可檢校戶部尚書使持節鄆州諸軍事兼鄆

州刺史御史大夫充天平軍節度鄆曹濮等觀察處置使  
散官勲如故

授路隨中書侍郎同平章事制

綏輯萬邦實資乎元首弼成庶績允屬於股肱將以導宣  
化源崇固理本立我皇極贊於時邕故任賢著於禹謨納  
誨彰於說命眷求懿德斯惟僉諧中散大夫守尚書兵部  
侍郎知制誥充翰林學士上輕車都尉賜紫金魚袋路隨  
性稟中庸氣含大雅身無擇行學不爲人敏識周通宏才  
恢博挺然仁者之勇蔚爲君子之儒祗事穆宗侍經內殿

敷堯舜之大典暢周孔之遺風雅言玉音奧義冰釋潤色  
王度發揮聖聰出入禁闈踐履華貫位彌高而惟謹任愈  
重而滋恭逮及先朝復參密命雍容侍從早已賦於甘泉  
左右便蕃未嘗言及溫樹周旋九載始終一心直道匪躬  
讜言盈耳每訪謨猷之指用陳裨益之誠出不忘於詭辭  
退必聞於削藁器可經國忠能致君跡其公正之方用升  
毗倚之任於戲干戈未息爾其宏智用以靜寇攘役戍尚  
勤爾其宣柔服以懷戎狄均國賦以安阜百姓振朝綱以  
綜覈羣才退無後言動必慮善貞爾百度弼予一人寵以

峻階委之極務往踐厥位時乃之休可正議大夫守中書侍郎同中書門下平章事勲賜如故

授李宗閔同平章事制

王者祗順天道統理人極茂育品類變調陰陽必在旁求股肱宣翼機務朕嗣守寶位於今四年屬滄景構奸河朔未靜兵甲屢釁蒸黎匪寧納隍在予輶食興歎今苗頑旣革華夏思安爰登臺臣弼我元化正議大夫尚書吏部侍郎上柱國襄武縣開國侯食邑一千戶賜紫金魚袋李宗閔立德秉彝履道居業文行可以經邦國忠正可以動神

祇周知變通識達今古自望高多士名重四朝奉絲綸於  
掖垣平銓綜於省闈公直有裕清貞自持固可以相導雍  
熙光膺夢卜以匡台德用濟巨川宜昇樞軸之尊俾叶鈞  
衡之政於戲知臣匪易求賢惟勞膺三台之崇贊萬機之  
重啟沃之義注於予衷爾其舉正去邪以清百辟提綱舉  
法以肅羣司簡政勤心以安兆姓推誠忠恕以靖四方嚴  
制度以宏典常信賞罰以旌淑慝有犯無隱進思弼違服  
茲寵光尚致予理敬戒休命無替嘉猷可守本官同中書  
門下侍郎平章事散官勲封如故

封皇子永爲魯王制

朕恭承寶位欽若璿衡兢業戒懷懼忝洪構今皇嗣誕秀  
旣流慶於天枝白茅啟封宜分王於土宇用崇大典式固  
丕圖長男永植性端莊稟靈聰哲神氣挺於岐嶷和粹精  
於儀形姿範藹然是用嘉慰將奉聞詩之教冀彰樂善之  
風俾洽寵恩允膺錫命庶表祥於麟趾爰建社於龜蒙敬  
哉戒哉無忝我列聖之休德可封魯王仍令有司擇日備  
禮冊命

授牛僧孺兵部尚書平章事制

昔漢宣帝用邴魏以成中興之業我元宗任姚宋以致開  
元之理其術無他得賢而已朕猥居大寶首涉五年宵旰  
靡遑憂勤至切將倚任於國柄宜登進於人傑俾其復運  
樞極載清化源斷自朕懷允膺僉屬武昌軍節度鄂岳蘄  
安黃申等州觀察處置等使金紫光祿大夫檢校吏部尚  
書同中書門下平章事使持節郢州諸軍事郢州刺史上  
柱國奇章郡開國公牛僧孺氣含元精體包大雅識用夷  
密襟靈沈粹窮聖賢旨奧之學鋪邦國經緯之文蔚爲名  
臣秀出羣萃長慶御歷登賢濟人廊廟有光臣工得職代

天協理時乃之休先朝與能出兼征鎮毗俗丕變師旅大  
和宣力事君時乃之績朕飽聞器業虛佇風儀會曹參之  
促裝喜韓侯之來覲便殿延對前席與言通古今理亂之  
源知教化損益之務其應如響不知所然是宜卿長夏官  
平章大政康濟四海毗予一人於戲君不能自爲堯舜必  
待其臣以致之臣不能自爲伊臯必待其君而任之致則  
期於盡忠任固在於聳善然後上下交泰君臣相須爾其  
使百官得其人萬事得其序邪正之路必判清濁之流必  
分金堅一心扼制羣類無重否德予皆仰成可兵部尚書

同中書門下平章事散官勲封如故

贈李絳司徒制

朝有正人時稱令德入參廟算出總師千方百寵任之臣  
橫罹不幸之酷殄瘁興歎搢紳所同故山西道節度管  
內觀察處置等使銀青光祿大夫檢校司空兼興元尹御  
史大夫上柱國趙郡開國公食邑二千戶李絳神授聰明  
天賦清直抱仁義以希前哲立標準以程後來抑揚時情  
坐致台輔佐我烈祖格于皇天仗鉞宣風聯居樂土乘軒  
鳴玉嘗極清班先聲而物議皆歸不約而羣情自許漢中

名部俾遂便安而變起不圖禍生無兆殲良之慟聞計增  
傷是極哀榮用優典禮三公正秩品數甚崇式表異恩以  
攄沈痛可贈司徒仍令所司擇日備禮冊命賻布帛三千

段米粟二百石

授宋申錫行尚書右丞平章事制

出納大命宰司元化調四氣以統和天人貞百度以鎮安  
夷夏必資髦傑用委鈞衡朕嗣守丕圖思宏至理萬物之  
重屬於台臣仄席勤求冀裨不逮況素效久彰於密勿精  
才已得於詢謨擢自內庭授以袞職爰立左右斯爲得人

朝議郎守尚書右丞上柱國賜紫金魚袋宋申錫岳降全  
德天資正性處約居厚蹈中秉彝文每掇其精華學必探  
其元蹟夙播休問拔乎羣倫自選入周行參我內署奉職  
恭肅率心坦夷蘊沖用以究國經鋪訓詞以潤王度密贊  
彌久宏益滋多朕累因暇日召於別殿訪以大政觀其立  
誠而胷襟洞開肝膈無隱識精詞直實契虛求固可以披  
持化權參決理本是用升於鼎鉉付以樞機繇仙闈總轄  
之司當宰輔具瞻之地熙此庶績弼予一人於戲元首以  
司牧萬方股肱以協贊皇極上推公以馭下臣竭忠以戴

君際會交感而臻大化厯視前古何莫繇斯子方率是道  
以臨兆人爾宜悉乃心以成一德敬戒厥位永孚於休可  
正議大夫行尚書右丞同中書門下平章事勲賜如故

降漳王湊爲巢縣公制

王者教先立愛義不遺親豈於同氣之中可致異詞之間  
如或慎修不至詿誤有聞構爲厲階犯我邦紀未加殛竄  
尚屈彝章潭王湊手足之親盤石是固居崇寵秩列在戚  
藩頃多克順之心亦有尚賢之志而滿盈生患敗覆自圖  
姦兇會同謀議滋及汙我皇化彰於中外初駭予衷載驚

羣聽尚以未具獄詞猶資審慎建侯之命姑務從寬於戲  
朕嗣守宗祧敷宏至教自家之訓未立掩義之私敢忘是  
用降封有醜朝典凡百多士宜諒朕懷可降封巢縣開國  
公

貶宋申錫太子右庶子制

君臣之道義切初終股肱之良任存正直苟涉邪枉自紊  
憲章既虧恪慎之心難委弼諧之任正議大夫行尚書右  
丞同中書門下平章事上柱國賜紫金魚袋宋申錫學習  
儒門職參翰苑備我顧問洽茲寵光謂其啟沃竭忠擢登

鼎鉉而乃踐修不慎自底愆尤知臣之規俾予增愧欲遏姦回之路宜先懲勸之源豈可猶秉樞機仍司考轄罷居台席列位龍樓誠謂寬恩用全至體朕以事狀之間慮其冤濫鞫驗之際須務詳明當竚得情以申後命可行太子右庶子散官勲封如故

貶宋申錫開州司馬制

勅正議大夫新授太子右庶子上柱國賜紫金魚袋宋申錫頃由藝文擢處近密謂能潔己可以佐時遂越常資超升大任自參樞務驟易寒暄嘉謀蔑聞醜跡斯露致茲獄

訴實駭朝聽俾窮根本亦對詞稱以左驗之間有所漏網  
正刑之際姑示寬恩於戲朕自君臨推誠寧輔常務仁恕  
以保和平豈意魚水之期翻貽吳越之慮撫事興歎中宵  
耿然是用重難親臨鞫問謀及耆德徧於名卿庶其盡忠  
頗爲審克屈茲彝憲俾佐遐藩凡百具寮宜知朕意

授李德裕平章事制

弼亮鈞衡宣翼統紀明景化以凝庶績啟嘉謨以建大中  
爰求國楨以輔台德銀青光祿大夫守兵部尚書上柱國  
贊皇縣開國伯食邑七百戶李德裕元精孕靈和氣毓德

堅直成性清明保躬貞規澹夷敏識沖遠學總九流之奧  
文師六義之宗令聞夙彰僉諧允屬自提綱柏署掌誥禁  
闈釐紀律詳平之司竭訏謨密勿之節洎廉察浙右總鎮  
滑臺再委旌旄緝安邛蜀克有殊政咸懷去思諒惟全才  
茂此聲績朕以疇庸之典彝訓所先入遷司馬之崇彌積  
濟川之望是宜納誨朝夕擢居股肱勉宏伊呂之勲以嗣  
良平之美業傳相印門襲戎旗紹絲綸內職之榮繼鼎鉉  
中樞之重珪紱之盛恩輝罕儔爾宜罄乃忠貞副我毗倚  
無忝承命服茲寵光可守本官同中書門下平章事散官

勲封如故

授王涯同平章事制

居端揆之任再踐國鈞稽筦榷之功兼司邦計爰崇舊德以緝新規簡自朕心用光僉屬金紫光祿大夫守尚書右僕射充諸道鹽鐵轉運等使上柱國代郡開國公食邑二千戶王涯元精降靈體道秉哲恬智成性清貞保躬文行可以經邦風操可以鎮俗以明用晦處貴滋恭憲宗以禁署竭忠擢登輔弼先帝以台階宿望寵授旌旃陰陽燮調藩服寧謐機務允理政經文修洎綜銓九流式序百禮提

釐紀律統明貨泉法必便人事先體國聲績茂暢洽於羣  
謠朕以邊鄙防微猶存兵戍資儲之備供億尚繁頃者支  
費轉輸任分兩使量入制用誠患多門俾足食以豐財在

省員而簡務是用合此二柄委於元僚正茲通變之初藉  
我股肱之重勉思率職無或憚煩敬戒乃心欽承休命可  
守本官同中書門下平章事充度支及諸道鹽鐵轉運使

答請慶成節表制

省表具知朕以誕生之日延集繙黃式遵常儀用宏二教  
卿等啟心輔德叶志納忠稽貞觀開元之舊章述慶善千

秋之令範爰崇誕日請號慶成顧予寡昧懼忝彝典今以同歡心於萬國申盛禮於兩宮深嘉誠勤是用依允

封諸王男爲郡王制

王者子弟畢封藩國並建所以式固盤石克茂本枝故澧王大男漢可封東陽郡王第二男源可封安陸郡王第三男演可封臨川郡王故深王大男潭可封河內郡王第二男淑可封吳興郡王故絳王大男洙可封新安郡王第二男滂可封高平郡王故洋王大男沛可封潁川郡王淄王大男滌可封許昌郡王沔王大男瀛可封晉陵郡王祁王

大男溥可封平陽郡王仍並賜光祿大夫宜令所司擇日

冊命

授李宗閔中書侍郎平章事制

職代天工望歸人傑必資求舊允副僉諧山南西道節度  
管內觀察處置等使兼興元尹銀青光祿大夫檢校禮部  
尚書同中書門下平章事上柱國襄武縣開國侯食邑一  
千戶李宗閔巖廊正人宗室全德才惟不器道實生知粹  
茂體陰陽之和周旋成禮樂之用外宏疎朗中實誠明白  
璧凝溫朱絲秉直文窮三變學洞九流早以忠規契於審

象雅有元略能宣大猷底寧戎蠻協贊郊祀見可而進知  
難靡回啟心常罄其嘉謀造膝必聞其法語行父事君志  
存於嫉惡臯陶承弼道遠於不仁康濟而金柅有倫變調  
而玉燭無爽譽諤勵大臣之節端莊清至化之源修明典  
章慎選方岳敷我利澤臻於治平自出鎮漢中旣周星律  
巴俗雖歌乎來暮國人頗詠於去思遂用徵還蓋從公望  
及延召宣室益加前籌是宜再陟中樞直修袞職咨爾良  
輔其聽朕言夫天地交泰則時和君臣訢合則國治眷求  
一德出納萬機勉宏如水之心式副濟川之用命官罔及

於私昵詔爵必俟於賢能俾庶績惟凝彝倫攸敘無忝注  
意敬之戒之可守中書侍郎同中書門下平章事散官勲  
封如故

恤刑制

仍歲水旱黎民艱食其宰牧非才貪殘爲害及承前積弊  
須有條流或冤獄留滯速宜疏決者並委觀察使糾察詳  
訪具狀聞奏用弭天眚

授賈餗中書侍郎平章事制

寅亮皇猷丹青景化爰從選衆之舉乃得非常之才前浙

西道都團練觀察處置等使朝議大夫檢校禮部尚書持  
節潤州諸軍事兼潤州刺史御史大夫上柱國姑臧縣開  
國男食邑三百戶賜紫金魚袋賈餗識達韻孤學深行直  
貞和自立介特不羣能操至公每契中道聲逸羣聽善諧  
朕心自尹京師尤彰望實亟召便殿屢陳嘉謀罄肝膈以  
納忠規推誠明而無外飾察言考事深用得之近命列藩  
益聞僉論固可以參我大政陟於中樞天啟予懷賚此良  
弼爾其守法制平鈞衡貞王度以振國經釐百工以凝庶  
績舉直錯枉當官而行於戲爲君之戒在知賢而不任爲

臣之患在保位而不言罔或依違虧吾則哲可守中書侍郎同中書門下平章事散官勲封如故

貶李德裕袁州長史制

有國之典本於明罰爲君之道必在去邪皇王大政諒無易此姦兇與比誠敬盡虧無君之心因事輒見豈可尚居崇秩猶列東朝銀青光祿大夫守太子賓客分司東都上柱國贊皇縣開國伯食邑七百戶李德裕性本陰狡材則脆弱因緣薄藝頡頏清途旣忝藩鎮旋處鈞軸靡懷愧畏肆意欺誣廢撓舊章汨亂彝序賢良盡逐當白晝而重關

詭詐是謀逮中宵而萬變朕嘗以寒暑得疾初甚驚人凡百臣子奔走道路而德裕私室宴然全無憂色王涯駐車道左絡繹追呼滿朝傾駭竟以不至又在西蜀之日徵逋縣錢僅三十萬貫使疲羸老弱轉徙溝壑交結異類任用愴人賄賂流行朱紫無辨是宜處之重典以正刑書猶以夙經委使載深寬宥俾佐遐服用示寬恩可守袁州長史馳驛發遣

授李固言門下侍郎同平章事制

惟昔太宗聰明睿聖克致治平惟魏徵左右文祖叶建皇

極矧朕寡薄思紹丕烈旁求魏徵之比寘諸巖廊庶裨不  
逮用底於道御史大夫李固言生於山東瑞此王國爰在  
下位早揚直聲介然無朋中立不懼文經邦俗行表人倫  
和嶠負棟梁之材辛毗有骨鯁之操便蕃華貫光啟令圖  
日者徵自近郊延於便殿言多方格道不容回嘉謨有倫  
正色無撓朱絃暢疏越之韻美玉呈特達之姿洎長憲臺  
彌彰休問固可以斟酌理本變調化源疇咨僉同夢卜斯  
協命爾予翼倚爲股肱登於黃樞參我大政爾當一乃心  
志罄貫忠貞澄清品流旌別淑慝俾四夷左衽咸寧吾教

侯伯卿士各稱厥官罔曰難理惟其至公罔曰弗能惟其悉力欽哉戒哉無忝前良可門下侍郎平章事

授舒元輿李訓守尚書同平章事制

出納王命流品衆職覃理化於區夏謹法度於巖廊是有文可經邦才惟濟代列於百辟之上俾輝三台之光令我夢勞果獲惟肖爰舉並命以寵非常朝議郎守御史中丞兼刑部侍郎上柱國賜紫金魚袋舒元輿杞梓長材金玉正性道懷邴魏詞擅菁英居然不器之能雅蹈中庸之美自擢領綱紀肅清朝廷碩望允歸於應期讜言莫匪乎體

國守兵部郎中知制誥充翰林學士賜緋魚袋李訓軒纓  
鼎族河岳閒賢德茂臯夔文含雅誥窮易悟象繫之表吐  
論成邦國之經泊參職內庭發揮王度盛業見乎造膝明  
識藹於伏蒲並沖敏執中端粹不倚咸蘊莫磷之志克宏  
作礪之規珪璋有聲鸞鳳有采朕常法官高視所寶惟賢  
方清化源遂得時傑嗚呼君執象以端展臣推公以秉鈞  
夙夜一心小大同體則和天地序陰陽臻乎治平吾所寢  
寤爾宜率匡國之道明理人之方俾其致君無愧往哲咸  
陟樞柄佇宏大猷秋官禮闈莫非寵任祇厥成命往惟欽

哉往者朕究大易皆訓之義也尚未終卷政事之暇宜三  
兩日一度入翰林元輿可守尚書刑部侍郎同中書門下  
平章事訓可守尚書禮部侍郎同中書門下平章事仍賜  
紫金魚袋

授王涯開府儀同三司充諸道榷茶使制

門下王者峻其禮秩所以報殊庸崇其職業所以歸碩望  
其竭股肱以宣力抱誠明而戴君調四氣以統和天人貞  
百度以鎮安夷夏勤彰於山澤德冠於巖廊不舉寵章曷  
示褒勸金紫光祿大夫守司空兼門下侍郎同中書門下

平章事兼充宏文館大學士太清宮使及諸道鹽鐵轉運  
等使上柱國代郡開國公食邑二千戶王涯誠貫金石行  
通神明氣含元精識洞蓍蔡窮聖賢旨奧之學擅邦國經  
緯之文爲時而生作予良弼長才推於精敏雅量得其寬  
和乃者重升帥壇所至必理載踐台席楙昭休勲當險夷  
之途貞白無染在風雨之晦操尚不衰莅事秉明哲之心  
臨難有大臣之節執萬機之政柄統四海之利權處劇而  
神慮益閑在貴而家法愈儉憂國盡瘁罄其訏謨爰自累  
年江淮水旱煮海之利日用而不虧佐賦之功歲杪而後

顯轉輸之利相繼牢籠之資無遺經費有餘時乃之力況  
邦計之務總領尤難付之均節克有饒羨朕今以茶法稍  
弊理須變更凡斯重難悉以資委禮當優異式表至公俾  
進級於三司仍策勲於八命予皆仰成汝其欽哉往踐厥  
位可開府儀同三司充諸道鹽鐵轉運榷茶等使餘並如  
故